

Na 2005

Museo Arqueologico Aruba lo sigui instrui hobennan y muchanan tocante historia Indjan

ORANJESTAD - Aña 2004 abata un aña importante pa Museo Arqueologico Aruba (MAA) den cual actividadnan publico y experencianan nobo a tuma lugar. MAA a haya bishita di 3103 persona. Entre nan 26 scol cu 1039 alumno. Como un experimento, museo a habri su sala di exposicion pa publico riba e ultimo diadomingo di luna, pa asina duna oportunidad na cada persona pa bishita Museo. Den totalidad 679 persona a bishita museo riba e ultimo diadomingonan di luna.

Tambe a haya bishita di 47 periodista internacional, procedente di entre otro Hulanda, Belgica, Venezuela, Colombia, Suecia y Brazil. E

lunanan miho bishita tabata Maart y Juli. Na Maart esaki tabata dor di e actividad riba “Dia di Himno y Bandera”, 18 di maart, den cual museo hunto cu UNOCA y CHARUBA a enfoca riba publicacionan tocante nos isla y nos idioma Papiamentu. Na Juli museo a haya hopi bishitante hoben pa e programa di vakantie: “Oraobao, isla di cocolishi”, na cual den total 465 mucha a participa.

REACCIONNAN POSITIVO

Reaccionnan di tanto mucha como mayorman tabata hopi positivo. Na 2004 MAA a cuminsa traha cu un grupo di boluntario, “amigo di museo”, cu a yuda cu cierto

actividadnan riba entre otro e ultimo diadomingo di luna, 18 di Maart y e programa di vakantie. Na 2005 lo sigui instrui e hobennan aki cu e intencion pa e muchanan interesa siña tocante historia Indian. Na November MAA a presenta su di diez publicacion: “The Archaeology of Aruba: The Marine Shell Heritage” na publico. Den cuadro di esaki a organisa algun actividadnan, manera e programa di vakantie y riba e ultimo diadomingo di luna di november cu tema “Kerstboom bao di lama”. Huntu cu UNOCA a organisa un workshop cu e tema: “E rol simbolico di artefactonan di cocolishi” cu a ser duna na November na alumnonan di 2e klassen di algun school secundario. Esaki lo ser ripiti e aña aki na April y Mei pa otro scolnan. “The Archaeology of Aruba: The Marine Shell



Heritage” ta na benta awor na Museo Arqueologico Aruba y tambe na librerianan. Pa 2005 Museo Arqueologico Aruba atrobe tin algun actividad riba programa pa publico. Na April 2005 Museo lo presenta un charla di arqueologo drs. Harold Kelly. Pa celebracion di nos dia nacional Himno y Bandera, dia 18 di maart,

Museo Arqueologico conhunto cu Museo Historico y Museo Numismatico lo organisa un “speurtocht” riba dia 16 di Maart atardi. Den vakantie grandi tambe lo bin cu un programa di vakantie atrobe pa nos muchanan y asina lo tin mas actividad pa 2005. Keda pendiente pa mas informacion tocante esakinan.